



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

North Korea-i solid-fuel missile tendangba shiogo

Asia Olympic Qualifiers: Yogesh-i gold medal ana angu



VOL. XXI NO. 93 (ADOK 93)

DIMAPUR

SANGTENNÜ (TUESDAY)

ANJETI (JANUARY) 16, 2024

₹ 5.00



Scan for more information

Hamara Sankalp Viksit Bharat

Modi Sarkar ki Guarantee

Linük renlokba nung tetsürtemi shilem tajung agiba

Nari Shakti Vandan Adhiniyam ajanga tetsürtem nem Lok Sabha aser state legislative assemblies nung 33% reservation temeten agütsür

dhc226/19/01/57234

Bharat Jodo Nyay Yatra: Rahul Gandhi-i aniba telok Nagaland tongogo



Kohima, January 15, 2024 (TYO): Congress lennir Rahul Gandhi-i Manipur nungi Mumbai tashi 'Bharat Jodo Nyay Yatra' agiba Nagaland tongogo.

Hombor nikongdang Kohima district kübok Khuzama yimtsüng tonga aru.

AICC president Mallikarjun Kharge-i Deobarnü iba yatra tenzüksü aser tanü nikongdang Rahul Gandhi-i anir Khuzama tonga aruogo ta Nagaland Pradesh Congress Committee (NPCC) Working President Khriedi Theunuo-i ashi.

Iba mapang Khuzama yimdaklirtemi Rahul nem sobaliba inyakyim ajanga Rahul aser par telok pelaa agizük, ta pai ashi.

Rahul-i Khuzama yimdak anenzükdang Naga Hoho dena Naga lisopur teloktem civil societies aser arogotem den ajurutepe sendentem amentsü. Iba mapang parnoki tebilemtsütem aser khuretem lemsateptsü, ta Theunuo-isa ashi.

Rahul Gandhi-i Nagaland kübok district pungu- Kohima, Tseminyu, Wokha, Zunheboto aser Mokochung ajanga süitsü aser iba sülen January 18 anepdang Assam-i aotsü.

Mongulbarnü Rahul-i Viswema yimtsüng nungi Yatra indang Nagaland leg tenzüksü aser Kohima jila nung aliba World War-II cemetery nung narjung

ka yutsütsü aser High School lenjem nung public den jembiba sülen tanga district temi aotsü.

"State balala nungi Naga nunger teloktem tenung nung Naga Hoho teshimtet telok kati tanü nikongdang Rahul Gandhi den ajurutepego. Khuzama ground nung Bharat Jodo Nyay Yatra campsite nung pa den ajuruteptsü" ta Jairam Ramesh-i metetdaksü.

India sorkar aser NSCN-IM tsüngda August 3, 2015 nü Framework Agreement sign sütepeba ama mapa meinyakba atema Naga Hoho-i Rahul nem memorandum ka agütsü.

Framework Agreement nung sign süteper küm 9 jungnüa arur saka paper teshizük ka ama dang lir. Iba ya Prime Minister-i meinyaksü sernung nangzükba mapatem rongnung ka lir ta Naga Hoho-i ashi.

Parnoki Rahul Gandhi dang iba onük Parliament nung benoka lemsateptsü ayongzük.

Framework Agreement sign mesütep dang tanga political party tem aser talisa iba mapang North-eastern state asem-Arunachal Pradesh, Assam aser Manipur nung Indian National

Congress sorkartem dang masüngdangtep, ta Rahul-i Naga Hoho lennirtem dang ashi.

Framework Agreement maparen ya Prime Minister-i tenung tajung agitsü mapatem rongnung ka liasü. Tang tashi iba Agreement nung keta aliba onüktem memetet ta Jairam Ramesh-isa metetdaksü.

Bharat Jodo Nyay Yatra Nagaland

Day 3: January 15, 2024

08:00 Yatra resumes from Viswema, Kohima

09:00 09:20 Paying homage at Kohima War Cemetery (22Km)

09:30 Public address at Phulbari, Kohima (from the Bus) (500Mtrs)

12:00 Morning break at SCERT College Ground Chiephobozou Town (28Km)

14:30 Yatra Resumes near Rengma Sports Association Ground, Tseminyu (22km)

16:30 Public address (from the Bus) and Evening Break at Wokha (29Km) Night Halt at Chukitong, Wokha (14km) by car

Day 4: January 17, 2024

09:00 Yatra Resumes from VK town, Zunhaboto (32Km)

10:30 Public address at Main traffic point Mokochung (from the Bus) (30Km)

11:30 Morning break at Chuchuyimpang village grounds (32Km)

14:30 Yatra Resumes from Chuchuyimlang police out post (23 Km)

16:30 Evening break at Merangkong Town (28Km)

Night Halt at Aohadang Ground Tuli, Mokochung (14Km) (by car)

Day 5: January 18, 2024

08:00 Yatra Resumes Near Post Office Tuli (1.5Km)

09:00 National Flag Handover Ceremony @ Nagaland - Assam border (17Km)

12:00 Morning break at Puthinadi, Jorhat (44km)

14:00 Yatra Resumes from Nakachari Debarapara, Jorhat (5km)

Dimapur & Chumoukedima nung tenokdangba agütsür

Dimapur, January 15, 2024 (TYO): January 17, 2024 nü India Tir Droupadi Murmu-i Dimapur Airport nung arua anenzüksü aliba atema Dimapur aser Chumoukedima district tem nung security atema tenokdangba kar agütsüogo.

January 17, 2024 anepdang 06:00 nungi aonung 6:00 tashi tenokdangba kar agütsür ta Commissioner of Police Dimapur Kevithuto Sophie, IPS-i ashi.

Dimapur aser Chumoukedima district nung

mapang tatakzük tsüngda Drones amala Remotely Piloted Aircraft (RPA) amala mamshitsü.

Security Forces/ Civil Police/ Central Police/ Private Firing Range mesüra licensed fire arms alir civilian shingaia FIRING PRACTICE malitsü aser FIRECRACKERS mamshitsü.

Iba sangdong ya kija shia nem magütsüteter anungji DCPS, ADCPs, ACPs aser Police Stations nung Notice Boards nung yutsütsü ta Commissioner of Police Dimapur-i metetdaksü.

Assam nung 3.6 magnitude menoknok anak

Guwahati, January 15, 2024 (Agencies): Hombor nikongdang Assam nung 3.6 magnitude asadangtetba menoknok ka anak.

National Center for Seismology report ajanga ashiba agi taonung 7.12 ako nung East Karbi Anglong district tiyongtsü ser menoknok anak.

Iba menoknok ya Brahmaputra anüolentip tsütsü tzükümlen ali telunglen kilometre 23 ir anak ta National Center-i ashi.

Menoknok anakba tiyongtsüji Guwahati nungi kilometre 170 shi pilar Nagaland arrtsü anasa liasü.

West Karbi Anglong, Hojai, Dima Hasao, Golaghat aser Nagaon district tem nunga menoknok anakba meteta liasü.

Maneni, Nagaland aser Manipur nunga tesem kar nung menoknok anakba metet ta report nungsa shia lir.

Ajisüaka iba lendong nung nisung yiruyibongba mesüra kiojen raksaba osang kecha mali.

NNPG aser NSCN/GPRN dang mapa inyaksü ajungmesor



Dimapur, January 15, 2024

(TYO): January 23, 2023 nü "Nagas Are Moving Ahead" sangdong agütsüba asangsang nung mapa tenzuka aotsü atema January 15, 2024 nü Dimapur nung Forum for Naga Reconciliation (FNR) kübok Naga nunger tongti teloktem aser Arogotem ajurutepe senden ka menogo.

Parnoki NNPG aser NSCN/GPRN "September Joint Accordant" 14 September, 2023; "Kolkata Meeting" 18 October, 2022 aser "Nagas are Moving Ahead" 14 January, 2023 nung nangzüktepba ama nendaka inyaksangshitsü ayongzük.

Tanü senden nung adenertemi NNPG aser NSCN/GPRN-i Naga nunger ola angashitsü imlar ta Forum for Naga Reconciliation (FNR)-i sangdong ka nung ashi.

Iba senden nung asenok renloka aotsü aser azükarutsü atema Naga nunger ajak longjemtsü aser kati ka den amaliteptsü jembitsü.

Kin shia aser yimtenren telok ajak akhümtsübutepa asenok tsüngda amalitep alitsüla ta senden nungsa jembitep.

Politics aser politics yimya melenshir anungji asenok linük ka ama longjemtsüba süra kati ka agizüksüla aser amalitep alitsüla.

Pei nija tangatetba ajanga tangar den amalitep melitetsüsa kümra asenoki tangar jenjang akhümtsübutüla. Naga nunger tsüngda shinga ila mebilemtsüla mesüra ulua mebilemtsüla. Maparen ajak nung onok yimjung aginür, ta tanü senden nungsa metetdaksü.

India sorkar dang general elections matongdang Naga yimten tenangzükbatem mapa inyaka aotsü atema senden nung adenertemi sentong balala ayonga agitsü lemtet. Anungji item sentongtem nung Naga nunger ajaki yariteptsü mepishir, ta senden nung adenertemisa metetdaksü.

Niuland nung Viksit Bharat Sanklap Yatra tembangogo



Dimapur, Aenjeti/January 15 (TYO): Central sorkari sentong balala ayongzükba nüburtem nem angatdaksütsü mechi linük tesem ajungalen ayongzükba Viksit Bharat Sanklap Yatra (Urban) ya Niuland district nung temogo.

Deputy Commissioner, Niuland, Sara S Jamir-i ashiba

agi, Viksit Bharat Sanklap Yatra ya pei sasa pei peria alitsüba nükjidong tongdaksüba sentong ka lir aser India ya 2047 tashinung 'developed nation' ka kumdaksütsüba asoshi lir.

Lai temsüa alir ajunga dang teyari balala agitsü atema department balalai amenoka aliba counter nung tenüng

züluoktsü ayongzükba liasü.

Iba sentong nung sanklap pledge agiba den Ato Kilonser Narendra Modi-i jembiba o angaba, teyari agirtem nungi takok otsü lemsatepba liasü.

Maneni Ayushma Bharat, PM Svanidhi amala registration atema counters lapoka liasü.

Kohima District Planning & Development Board senden menogo

Dimapur, Aenjeti/January 15 (TYO): Kohima District Planning & Development Board senden January 15, 2024 nü DPDP Hall, Kohima nung mena liasü.

Iba senden nung Advisor, Prison, Printing & Stationary aser Chairman, Kohima DPDB, Er. Kropol Vitsu-i 15 Southern Angami-II A/C kübok BDO aser SDAO office amenokba indang osang agitsü aser Administrative aser tim department dang maneni sorkar dangi abentsü asoshi nüngdakba kuli kaket tem bentettsü ayongzük.

Iba senden nungsa Assam Rifles Primary School, Tsiesema recognition atema

jembi aser nüngdakba mera agitsü atema sorkar dangi abentsü lemtet.

Iba senden nung mendenpuba, Deputy Commissioner Kohima, Kumar Ramnikant, IAS ajanga taoba senden nung lemtetba lepa reprangshia liasü.

Paisa district officer tem dang January 26 nü Secretariat Plaza nung Republic Day benjongmung nung adentsü ajungshia liasü aser iba tesem nung attendance agitsü aser taruba DPDB senden nung mera agitsü, ta ashi.

Republic Day exhibition football match atema DC-i district officers tem dang pei department nungi asayar ka tenüngbosa

January 19, 2024 tashinung agitsütsü ayongzükba liasü.

Administrator Kohima Municipal Council, Lanusenla L. Peseyie-ia iba senden nung Viksit Bharat Sanklap Yatra sentong January 19, 2024 nü Kohima Municipal Council ajanga ayongzükba agitsü ta ashi aser sendaktepa aliba department ajunga dang iba sentong takok ngua agitettsü asoshi yariteptsü ayongzükba liasü.

GM, DIC Kohima, Y. Intsangju Sangtam-i department inyakyim indang osang agitsü aser taruba senden nung RTO Kohima dang par department inyakyim osang agitsütsü nungloksü.

Nagaland nung VBSY Urban campaign mapang atsülanger



Dimapur, Aenjeti/January 15 (TYO): Nüburtemi kanga akhangba ajanga Nagaland nung Viksit Bharat Sanklap Yatra (VBSY) Urban campaign ya January 24, 2024 tashi atsülangogo aser state nung ano Urban Local Bodies (ULBs) talila 25 awajemtsü.

Taoba phases nung VBSY Urban campaign ajanga ULBs 16 tashi awajemogo. Iba campaign atsülangba ya January 13 nungi tenzük aser tang tashinung Kohima district kübok Cheiphobozou Town Council awajemogo aser Phek district kübok Meluri Town Council awajema lir.

Hombarnü iba sentong ya Nuiland district nung agi aser sentong ka Nuiland Town Council kübok Clock Tower nung agia liasü.

Iba sentong nung tesemdanger tongti ama Deputy Commissioner, Nuiland, Sara S Jamir aser mendenpuba ama EAC Vitoka Yepthomi dena liasü aser Administrator, Nuiland TC S Athsangla ajanga pela agizükba o jembi.

Iba sentong nung Ayushman Bharat/ Health camp, Ujjwala 2.0, PM SVANidhi aser PMJJB/MPSBY/APY amala service agüja liasü.

Sentong nung Ato Kilonser Narendra Modi-i jembiba angadaksü, LED inoka aliba VBSY van nung PM SAWANidhi sayu, Sanklap pledge agi aser Ayushman Bharat nungi teyari agirtemi parnok takokba otsü lemsatepa liasü.

DC Office Junction, Longleng nung tanabuba

sentong agidang tesemdanger tongti ka ama Deputy Commissioner, Longleng, Dharam Raj aser mendenpuba ama MTS Longleng Town Council, Isaac P Pongshi Keikung dena liasü.

Iba sentong nung SDO (Civil) aser District Nodal Officer VBSY Meyazungba Jamir-i tarur pela agizükba o jembi.

Iba sentong nungya Ayushman Bharat aser PM SVANidhi teyari agirtemi parnok takum otsü lemsatepa liasü.

Anogo ka anisüngzükba sülen Dimapur East Town Council, Peren district kübok Tening Town Council aser Mokochung district kübok Changtongya Town Council nung Bodhbarnü kasa sentong ya ayongzükba agitsü.

Pilar Küm Ka Ajunger

Lt. Dr. S. Imkongtushi Ao



January 16, 2024.

Tanü January 16, 2024 anogo nung, taküm nung kuli tajung akaba teindang nisung, meranga inyakba aser mangdang akaba tekümküm taküm, shiba nisung aikati matoksatet, pa taküm menungraseta bilemteter.

Nü tongmelang taküm saka onok taküm nung tatishitsü tajung asütsüsa litetba mapatem onok den teti alitsü aser aser nü temeim nung pelatepa aliba anogo tajungtem onoki teti bilemtettsü.

"PILAGO SAKA MAMATETER"

-Temeim Kinungtsü, Chirnur, Semchir aser Anük-Apangtem.

NHHDC ajanga State Handloom Expo ayongzüktsü

Dimapur, Aenjeti/January 15 (TYO): Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur, Nagaland ajanga Urban Haat, Dimapur nung February 16, 2024 nungi February 29, 2024 tashi State Handloom Expo ayongzüktsü.

Application atema February 12, 2024 ya tatem asütsü, koba Office of the Development Commissioner (Handloom), Ministry of Textiles, Govt. of India, New Delhi ajanga sponsor asüba lir.

Jangra aliba Co-operative society, Producer company, SHGs, Federations, Apex Societies, silk weavers, Jute Artisans aser KVIC densema Handloom & Handicrafts agencies temi iba Expo nung shilem agitsü ajungshir aser Project Cell, NHHDC Ltd, Half Nagarjan, Dimapur nem address tejangja, mobile number, Bank account number den IFSC code dener application agitsütsüla.

Stall ajak angati agitsütsü aser NHDP guidelines nung aliba ama Lumpsum TA/DA aser Freight charges agitsütsü.

Medziphema nung Republic Day atema senden amen

Dimapur, Aenjeti/January 15 (TYO): Republic Day anogomung asoshi Medziphema Sub-division kübok state aser central sorkar ketdangsurtem shisadokden senden ka ADC Medziphema indang Conference Hall nung January 15, 2024 nü mena liasü.

Iba senden ya ADC Medziphema, James Swu lenisüba kübok amen.

Iba senden nung Republic

Day anogomung atema sentong balala yanglua liasü.

Kasa mapang ADC ajanga department ajunga dang amalitep akatsü ayongzük aser ketdangsur ajunga iba sentong nung arua adentsü ashi.

ADC ajangasa ketdangsurtem dang pei mapa shidak inyaksü nenshia ashi.

Kasa senden nung teloki Sub-division nung mürekmeju mapa inyaksü lemteta liasü.

Transport Department-i bus taa melenshitsu


Dimapur, Aenjeti/January 15 (TYO): HSD aser danga osettsüset ajak nung jenjang timba akumba mechi Department of Transport, Nagaland ajanga NST Bus indang para (fare) aser hire asüba taa melenshiba metetdaksü.

Semi Deluxe tang sen 136 meshia aliba sen 156 meshitsü

aser weighted average tang sen 155 meshia aliba sen 178 meshitsü.

Kilometre 40 dak talangba meta talangi hire bener aiba nunga tekalen shia aliba ama meshitsü.

Stations/Sub-Station indang telungzük kilometre 40 tsüngta local hiring charges yamai alitsü: Ghonda 12 tashi amshiba sen 6,000 alitsü aser ghonda 12 dak tema atema sen 5,000 meshitsü saka ghonda 24 tashi dang alitsü.



New Delhi, January 15, 2024: Hombarnü New Delhi nung India Meteorological Department (IMD) kum 150 ajungba tetenzuk sentong nung linuk tatong Tir Jagdeep Dhankhar, Union Minister of Earth Sciences Kiren Rijju, IMD DG Mrutyunjay Mohapatra, Ministry of Earth Sciences Secretary M. Ravichandran aser IMD Deputy Director General (Admin.) Ranju Madan nung adenba noksa nung angur.

India-i kum 9 nung nisung cr. 24 sensak tia nungi anitetogo: NITI Aayog

New Delhi, January 15 (Agencies): India-i lenla aika nung sensak tia kanga ajemtsüba nung takok ngutetogo; shisaliok, anemalibaren aser takum jenjang lenlatem nung sensak tia kanga ajema kumogo, ta osang ka ajanga metetdaksü.

NITI Aayog report ajanga ashiba agi, tesüiba kum 9 tsungda India nung nisung crore 24.82 sensak tia nungi anitetogo aser iba ya ajanga linuk terenlok lenmang nung jajaba kuli sayur.

'Multidimensional Poverty in India since 2005-06' ta ajaba report ajanga ashiba agi, 2013-14 kum India nung lenla balala nung sensak tia shilem 29.17 ajema liasü aser 2022-23 kum shilem 11.28 ajema liasü aser ibaji shilem 17.89 ajema lir.

Kasa report ajanga, 2005-06 nungi 2015-16 nung sensak tia ajema shilem (kum shia shilem 7.69) ajema den medemdangra 2015-16 nungi 2019-21 tashi nung sensak tia shilem tajema liasü (kum shia shilem 10.66 ajem), ta metetdaksü.

MPI (Multidimensional Poverty Index) indicator teranaprongla kanga tajungba

kumogo.

Iba report ya Hombarnü NITI Aayog zungsem, Prof Ramesh Chand-i metetdaksü aser iba sentong nungji NITI Aayog CEO, BVR. Subrahmanyam-a liasü.

Iba report atema Oxford Policy and Human Development Initiative (OPHI) aser United Nations Development Programme (UNDP)-i technical tsütsü teyari agütsü.

India nung lenla balala nung sensak tia tajema akumba ajanga 2030 kum matongdangsa SDG (Sustainable Development Goals) nukjidong ataloktsü imlar, ta report nung shia lir.

2030 kum tashi nungbo alima nung sensak tia samatsütsü, alima kumzüksü aser ajak atema yimjung aser azukaru alitsü atema alimai nukjidong 17 yua lir, aser item nukjidong dangji Sustainable Development Goals (SDGs) ajar.

India sorkari lenla balala nung sensak tia ajemtsü atema 2013-14 nungi 2022-23 tashi nung mapatong aika benoka inyakba ajanga lir, aser item mapatongtem rongnung Poshan

Abhiyan aser Anemia Mukht Bharat densema lir, koba ajanga healthcare facilities tajungba kumdaksü.

Ano National Food Security Act kubok Targeted Public Distribution System ajanga nisung crore 81.35 nem angati jang agütsü. Pradhan Mantri Garib Kalyan Anna Yojana kubok ano taruba kum pongu tashi maneni janga angati agütsütsü teletetba agiogo.

Iba dak alia Ujjwala Yojana scheme kubok tetsurtem nem gas angati agütsü, Saubhagya ajanga electric light ajungketsü, Swachh Bharat Mission aser Jal Jeevan Mission ajanga nuburtem takum jenjang tajungba kumogo.

Pradhan Mantri Jan Dhan Yojana aser PM Awas Yojana ajanga nisung aika senotsü tsütsü tajangzük angu aser sensakertem nem ki angati sütsü.

State sasep nung, tesüiba kum 9 tsungda sensak tia nungi nisung teimtiba anitetba state ji Uttar Pradesh (crore 5.94) liasü. Bihar nunga nisung crore 3.77, Madhya Pradesh nung crore 2.30 aser Rajasthan nung nisung crore 1.87 sensak tia nungi anitet.

Congress aser AAP nati Chandigarh Mayor election atema longjemer

New Delhi, January 15 (Agencies): Opposition INDIA teloktep nung densema aliba party ana- Congress aser AAP nati taruba Chandigarh mayoral election nung longjemer tokteptsü atema candidates shimogo.

AAP-i mayor menden atema candidate toktepdaksütsü aser Congress-i senior deputy mayor aser deputy mayor atema tokteptsü asoshi party anati teletetba agiogo.

Hombarnü Congress lenir, Pawan Bansal-i iba osang ya metetdaksa liasü.

Indian National Democratic Inclusive Alliance (INDIA) teloktep nung aliba opposition party temi election nung BJP nem takok mengudaksütsü atema teletetba agiba ama inyaktsü bangjema lir aser tang mezung Chandigarh nung Congress aser AAP nati INDIA teloktepi lemteta aliba ama mapa kuma inyaktsü.

Chandigarh nung mayoral election January 18 nü agütsü aser tan election nungbo SC candidates atema menden shiteta lir. Lok Sabha elections

agütsü joko ita ishika dang lia Mayoral election atema AAP aser Congress na longjema ya INDIA teloktep atema tongtibang kechiyong iba ya INDIA teloktep aser BJP na tsungda tetendangba ka mesüka asütsü.

Mayoral election nung candidate tem rongnung Congress nungi Jasbir Singh Bunty aser AAP nungi Kuldeep Kumar na densema lir. Congress nungi Gurpreet Singh Gabi-i senior deputy mayor aser Nirmla Devi-i deputy mayor menden atema tokteptsü. AAP nungi Neha Musavat-i senior deputy mayor aser Poonam Sandeep Kumar-i deputy mayor menden atema tokteptsü.

Iba election nung BJP nungi Manoj Sonkar, Kuljeet Sandhu aser Rajinder Sharma nungeri mayor, senior deputy mayor aser deputy mayor menden atema tokteptsü.

Chandigarh Municipal Corporation nung councillors 35 lir. BJP nungi councillors 16 lir, AAP nungi 12 aser Congress nungi councillors 7 lir.



January 15, 2024 nü New Delhi nung Border Security Force (BSF) sepaitemi Republic Day Parade atema renemshidang tangokba noksa nung angur.

BSP-i Lok Sabha election nung tangar den meloktepi tokteptsü

New Delhi, Aenjeti/January 15 (Agencies): Bahujan Samaj Party (BSP) tongti lenir aser Dalit lenir, Mayawati-i taruba Lok Sabha election nung lar party-i tangar den meloktepi tokteptsü, ta metetdaksüogo.

Hombarnü la asoba anogomong nung lai, "Ni ya jangja-jangja metetdaksür- Lok

Sabha election nung Bahujan Samaj Party-i tangar den meloktepi tokteptsü, tanga party den melokteptsü," ta metetdaksü.

Mayawati-i INDIA opposition teloktep nung adentsüa akok, ta aikati bilema liasü saka Hombarnü lai iba sangdong agütsüba ajanga Uttar

Pradesh yimtenren nung kongshitsü.

Anepdang Uttar Pradesh Chief Minister, Yogi Adityanath-i Mayawati den tasoba anogomong salem lemsatepa liasü. Yogi-i social media ajanga tasoba anogo salem lemsatepba dang masü saka la dangia phone süa salem lemsatep.

PM Modi-i phone ajanga Russia Tir den jemb

New Delhi, January 15 (Agencies): Hombarnü Ato kilonser Narendra Modi-i phone ajanga Russia Tir, Vladimir Putin den onük aika nung o lemtepogo.

Lenir anatisa tarutsü nung teinyaktsü aliba maparen balala atema sentong yanglutsü bangjemogo.

Tesülen Modi-i X ajanga, "Tir Putin den junga sensaksemogo. Künati Special & Privileged Strategic Partnership kubok teinyaktetbatem atema jemb aser tarutsü nung teinyaktsü aliba maparen balala atema sentong yanglutsü bangjemogo," ta metetdaksü.

Paisa, "Künati regional aser international onük balala nung peipei tebilemba lemsatepogo, item onüktem rongnung takum BRICS nung Russia Tir asüba densema liasü," ta metetdaksü.

Lenir anatisa Ukraine tensa atema jembiba den külemi India nung general eletions aser Russia nung Tir election nung

takok angütsü atema lemsatep.

Russia nungia sangdong ka ajanga, "Vladimir Putin aser Narendra Modi nati linuk anaprong tajangzük angütsüsa aliba tesendaktep tashi itshitsü atema jemb aser Russia nung Tir election den India nung parliamentary elections nung takok angütsü lemsatep," ta metetdaksü.

Lenir anatisa India aser Russia na tsungda shishilembaba, rongsenketzung, science, technology, energy aser transportation densema lenla aika nung amalitepa inyakba ajanga inyaktetbatem asadangba den külemi Russian Far East atema amalitepa inyakba jenjang asadangogo.

Yakum August ita nunga lenir anati phone ajanga jembiba liasü. Iba mapang nungji Modi-i Putin den space tsütsü amalitepa inyakba, BRICS group ulushitsü aser New Delhi nung ayongzükba G20 summit atema lemsatepa liasü.



January 15, 2024 nü New Delhi nung linuk Tir, Droupadi Murmu-i Pradhanmantri Sangrahalaya semdangba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, JANUARY (AENJETI) 16, 2024

Mapa inyakba sobaliba

Alima nung nisung ajak mapa inyaker, kechiyong mapa inyaker chiyongtsüsa Tsüngremi nisungtem ya alima nung yuja lir. Aji oda, asenok mapa inyakba ya temang raksa anibelemtsüba masü saka mapa inyakba agi taküm nüngdak angutsü aser mapa inyakba ajanga temanga aser tokoloka arazüka anema pelapelaa alitsü. Ajisüaka, nisungtemi inyaktsüba mapaji ka dang masü saka zünger mezüngma, anungji alima tesem balala nung kin balalai inyakba mapatemji tapu aika lir. Aji oda, kari aluyima chiyongtsü züsenteter, kari shiruru metsür, karbo tzüim nung ango pua taküm alir, kari hon atur, kar mijang atur, karbo süng aser long mapa inyaker, kari office mapa inyaker aser nisung aika mapa tapu balala nung ayanga taküm alir. Item mapa tapu balala inyakertem jagi kati ka nüngdak peridaktsür aser pei inyakba mapaji pei sobaliba akümer. Mapa inyakba sobaliba nungji tongtibang kaji mapa inyakba mapang asütsü. Atangji, nisung aikati anogo piyong anepdang anü adokli nungi anü mai tashi kanga meranga inyaker. Ajisüaka, temang asoshia anisüngzük nüngdaker aser mapa inyakbaji temang mejungi kümdaktsütsü asoshi masü saka tachitajemtsü shitak ngua temang anema alitsü asoshi inyaker. Iba tangatetba nung alima tesem aika nung anogo shia mapa inyaktsüba mapangji ghonda ti asütsüsa ozüng küma lateta toktsür. Iba ghonda ti tsüngda nungji chia-ajemtsüba mapanga dena lir. Iba mapa inyakba mapangji mashi mapang ka nung pei tenzüknü dang tenzüker pei temnüdang atemtsüba masü saka anogo shia anepdang kasa mapang nung tenzüksü aser kasa mapang nung atemtsü. Kasaji aonung inyakertema mapa tenzüka mapang ka aser tembangba mapang ka lir. Anungji, alima nung mapa inyakertem shia ya pei saknüdang saksü aser pei mejangnü dang mejangtsü ta masü saka pei mapa inyakba mapang apir mejangba aser sakba mapanga sobaliba küma amshir. Iba ama mapa inyakba sobaliba nung mapang shitak amshia inyakertemi mapa inyakdak dang masü saka pei kibong nunga timi ketdang sütetter. Talisa, office aser industry nung inyakertem asoshi mapang shitak shitak amshitsüba kanga tongtibang lir. Ano, nübertem gari aser tayimtsü nung anir senzürtem asoshisa mapa inyakba sobaliba nung mapang shitak amshitsüba kanga tongtibang lir. Item indangji kodang shisadangdir, mapa inyakba sobaliba nung mapang amshibaren nung asenok khen süoki ia bilemdangtsü nüngdak reprangtettsü. Atangji, akhi nungi asenok ya mapa meranga inyakba kin lir. Ajisüaka, bilemdangtsüba kaji, tebok masünger. Aji oda, meranga inyaker tebok masüngba yabo, shitakba nung, tamamangtsüka lir. Iba timtemji kodang asenoki shisadangdir, asenoki meranga inyakba mapaji timi meinyakba ajanga asütsüa akok mesüra mapang shitak amshia meinyakba agia asütsüa akok. Itemji angateta kodang asenok mapang shitak amshia mapa shitak inyakdir, idangjiang asenok nüngdak periteta aliba dang masü saka asenok anema alitsü. Mapa nung mapang shitak amshitsüba sobaliba yabo mapa nung ayanger aser tenzükertem asoshi dang masü saka mapa kiburtem asoshia kanga tongtibang lir. Iba sobaliba nungji asenoki manidaktetba agi asenoki tangar mapa nung teyujena meinyaktetter. Tanü asenok loktiliba nung mapa inyakertem dangbo mapa meinyaker teimba küma aoba kuli kaji, mapa inyakba sobaliba nung mapang shitak amshia mapa meinyaktetba aser meinyaknüba ajanga atalokba tebilemstü asütsü. Alima nung kong aser kechi mapabo pei onüadang aotsü aser mounü dang maotsü ta asüba mapa ali? Joko asenoka timtema melinüra, mapa meranga inyaktsüba sobaliba dang masü saka aseni inyakba mapa nung mapang shitak amshia nendaka inyakba sobalibaji asen sobaliba akümstüla.

OLEMSABANG

NAGA NUNGER LEMTET LENDEN

~ P. Renthly Jamir

(Yashi adok nungi...)

Ano Khristan state-a ta asürji tongtibang tamanger tokolak NBCC maparen reprangdangra tang tashiba tayongzükba lokti yimyim kata takok nguteta mali. Mezüngbuba, missionary meyrirjang ter yoktsü nangzükba tamakok, alima rangben nung For Christ ta ajaba limajibo Nagaland dang. Envelope sarubo zünger mezüngma. Asia continent nung only Christian countryji Philliphine lima lir. Saka sübokrem magütsüra kecha meinyaktsür anungji miima envelope nung sen seper agütsür koba lima dang Land of Envelope ta ajar. Election nunga vote sen agi dang alir ta ashir. Corruption, corruption, Philliphine lima mesüka, iba putu nungsa ozü li ya missionary lima tang nai kümdakjang ta tena meyi ter yoktsü nangzüktep. Saka putu ka sür küm trok (1977-2023) süia oaka aji meyokteter. Küm ishikabo theology azüngtsü lanur aika seat bushitep. Saka ETC Jorhat aser CTC nung azüngtsü seat sen aser senpet yong yoktepa corruption tenzük, oda oda küm ishika tsüngda nung theology zügnür to tajemba tajemba küma tang tashi nung meyi ter tobo yutsür meyi pungo-a yokba osang mangashir. Ano küm 1989 nung yi tongpang ayonga tenzükba, mayoktsü ozüngbo yangludaktsü, saka tayokba kitembo teimba küma tajemer taliang züiner aser arogotemi yilar, mozular atema sentsüh atsüba mesüra pastortemi mapang agüja parnok semdangba arogo aika nung mangur. Clean Election yimyimbo ayimzuka yutsü saka arogo tenzükeri anir candidate dang sen meshia agir.

Yim aika yimdak yimer vote ajak nisung kati ajena amungdang pastorbaia senso temzüng alema Yisu kuli mesüteter. Yabo tim masü ta oda election temer ki toku ter bentoktsü dang tasü ita arogo tenzüker aser pastori anir teraksa anema ola madoker. Süra iba dangji koda sür Clean Election ta ajatsü. Mizoram nungbo tamanger lokti tashi aser parnok sarasadem agi item ajak akoker ajak melenshidaktsür. NBCC yagi election nungbo shilem magiyonga junger ta bilemer. National politics nung election tsütsü ano political solution tsütsü rangloker Reverend aser Missionary temi Geneva leni masü sama-a aliba tanelatem Yisu kangki nung rangloker Kalvary tenem leni ani nung dang temoatsü tuluba asütsü südi ta bilemer. Arogopur asoshi lemtet lendenji "To seek unity of the Nagas in Christ Not in the national movement."


Tatem nung ABAM inyakyim dangi arudi. Küm 151 tain dang kechashidanger melika. Joko ABAM-i agütsüba Reverend noklang asem abensadi asür aser independent arogo 170 tema züina aor. ABAM sen amshir mamshimar. Dimapur Ao Baptist Arogobo joko tershilem 5% budget küm shia sen lakh toku ano Kohima arogo lakh tenet ta adoker ta ashir. Süra küm ka nung arogo paika nungjagi tanga envelope tenlatem medeni sen kwi arutsü ta bilemer? Tang ABAM-i mission mapa tulu inyaka alima kin aika dangi missionary yokba angur. Saka asen Ao lima nungbo ano lemtet lenden nungsa merzua kazür ta bilemer. Kechiyong sen aika akaba agia teperi masü, ano pi limai missionary aika yok agibo takok ta masü sen aika aka nungji missionary yokba dang masü. Foot Hills Road atema-a sen aika agütsüogo. Aji tim, yimyo masü, government inyakyim nunga mela-a mali ta ashir. Küm 150 abensaba Jubilee mapanga kodanga mamatsüsa tarur ajak jebtepa senshi kechiyong lepko tangok kentener Mizo Choir Saimar adianu asüa ta kentener ajak jeba ken atenba agi tesenshi aonung jebtepa senshi. Ya kechi ataloktsüba Aor Jubilee Nokyu majung tembanger ta ata-a alinung osang tamajung ka angashi. ABAM okadaki aor (ABAM goes on trial). Joko okadaki aor asünung Aor Senior lawyer tajungbatem ayongtenogo aser tashi tulu aketba luden ka shimogo ta angashia nüburtem ya koda ta asüngdangtep nung Molungyimsen yimten den o akatsüba ta ashi.

Süra Aor Reverend paikaji missionary sayutsüngir paika ano tamangtir tenük ain akar mangdang jenti parnok sarasadem agi mokoktettsüsa case yamaji tulu no ta asadanger. Molungyimsen yim kibong noklang ana majung den okatsü anogo hapta ita meshilokli ta küm süitemdakja ABAM kübok aliba Aor arogopur ajak nüken nüktzü tendaktsür. Süra asenok mamangba purtem dangi sarasadem ajak melenshitsür ta amangangma tamakoktsü mali ta tenyonga nenok tamang jibijang teka danga lira ta sayuyonga koda aotsü ta nemjemseta bilemer. Asen tenük agi manguba o bendanger tuluba dak tamang mekatettsüsa ya koda asü ta nüburtem temulung shirangteper. Loti lenden lima apayua aji shimba ama Aor Reverendtembo ajak Dimapur nung nongtena lir. Pension senbo pei arogoi account shitak nung enokja agizüker. Anungji Ao lima arogotem aika nung arogoi Reverendbo meshitsür yimdak arogo nung teyariteperbo mali ta arogo aika lir. O ka bilemteter, 1999 July ita nung Rev. Pona Mopungchukit pai nibo yimdaksa alitsü. Dimapuri maotsü ta ashiba mamar.

Aor Reverendtemi Ao lima masen Dimapurang sapur aser Dimapurji pi lima. Anungji Aor arogotemi Reverend taginür ajak recommend masütsüla, ABAM-i temeshir ajak nem magütsütsüla. Tang ama yasa SHISHI ama agütsütepra arogo sen akayonga nütsüng dangbo reverend teimba küma parnok jenjang (value) mali akümstü. Naga lima state government tsütsü nüchiso bushir telok ajak aser arogotem inyakyim ajak nükjidong tajung maka senlu ayimer tesa ta asüba kuli India nung nisung tepseter rakzük raktemer teimtiba aliba state NAGALAND HAS HIGHEST EXTORTION Crime rate in India (Government data). World nung sen sen bushiba telok teimtiba aliba state Guinness World Records Certificate, Nagaland highest number of union and association state in the world (Guinness World Records LTD). Shisema aliba inyakyim, India lima osang, aser world records item yagi Naga nunger ano Lemtet Lenden nungsa lir ta kuli asür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Child Evangelism Fellowship-i 'Esther' animation series sayaogo



January 15, 2024: Internet aser online nung noksa tamajung nungi tanurtem jembudaktsütsü nükjidong nung Child Evangelism Fellowship (CEF)-i Laishiba nung Esther kakat nungi animated series "Esther" sayaogo.

Shilem pongu aliba "Esther" series ji mezüng January 6, 2024 nü saya; episode nungjaji "Esther; Once Upon a Time in Persia," lir. Episode shia nungji tanurtem tamang nung indaktsütsü nükjidong nung Laishiba tesayubatem lir.

CEF Director of Digital Ministries, Andrew York-i, "Tanü putu nung social media, advertisements aser internet sabang balala nung tanurtem atema noksa tamajung aika lir. 'Esther' ajanga tsüraburtemi pei chirnurtemi Laishiba nung shia aliba noksa tabansa repringdar ta metettsü," ta metetdaktsü.

Meeting platform firm Zipdo indang osang ka ajanga, arrshi küm 7 nungi 17 tsüngdapur tanurtem shilem 27 ibo internet nung noksa tamajung repringshio go aser online platforms ajanga shilem 41-i tamajung ajangshio go; iba dak alia arrshi küm 3-4 tsüngdapur tanurtem shilem 95-i hopta shia ghonda 8 bosa internet nung noksa balala repringteter, ta metetdaktsü.

Barna Research ajanga-a social media aser internet ajanga tanurtem aika kongshir, anungji item ama tanurtemi apps, video aser audio ajanga Laishiba-a angazüktettsü, ta metetdaktsü.

Küm 87 tejaklen tentetba CEF-i alima tesem ajaklen tanurtem den Khrista osangtajung lemsatepa arudar. 2022 küm kija nunga tanur million 19.5 dak temai CEF ministries ajanga Khrista

osangtajung angashi aser tesayur 439,000 nem training agüja liasü.

Tawa interview ka nung jembidang CEF Executive Vice President, Moises Esteves-i, tanur ajak den osangtajung lemsateptsü aser tanela nung indaktsütsü atema 1937 küm nungi tenzüka CEF-i inyaka arudar, ta metetdakja liasü.

Paisa, "Tanurtemi teimla osangtajung nungdaker aser Tsüngremi agütsüba teimla nungdaker. Osangtajung kanga nungdaka lir aser iba atemaji kishi lapoka dang lir. Tanurtem tila asüdangyongi aser temelungjang lapoka alidangyongi parnok nem Khrista metetdaktsüdi, kechiyong parnok tain kümerbo temenanj khuji kanga taret asütsü aser temelung temerangba kümer alitsü," ta metetdakja liasü.

Nicaragua nung Khristan putir 19 chiokba sülen Rome tonga ogo

January 15 2024: Nicaragua sorkari Khristan putir Rolando Alvarez densema putir 19 chiokba sülen parnok ajak Rome tonga ogo.

Vatican nung ketdangsertemi Rome nung Rolando Alvarez densema Khristan putirtemji agizük.

Parnok teimbaka Nicaragua nung Tir, Daniel Ortega-i aniba sorkari Catholic Arogo anema mita aoba mapang nung apuba sülen küm ka dak tali tepuokdak liasü.

Tir, Ortega-i, 2018 küm nürburtemi longkak aitba aser pa Tir menden nungi atsüngdoktsü merangba nung Khristan putirtemi shilem agiogo, ta tai tonglokja liasü.

Sorkari Vatican den aiben tongtepratepa jembiba sülen Khristan putirtemji chiok, ajisüaka parnok ajak Vatican-i aotsü atema tezüngzüktep agia liasü.

Tesüiba mapangtem nunga tepuokdak alir putirtem aika Rome-i yoka liasü.

Vatican sangdong ka ajanga, Amongnü nikongdang

putirtemji Rome tonga aru aser Vatican nung lenirtemi parnok agizük, ta metetdaktsü.

Tir Ortega-i yaküm February ita nunga tepuokdak alir 222 Unieted States-i yoka liasü. US sorkar den tezüngzüktep ka agiba sülen parnok chiok saka US-i yok aser parnok senso temeden agien.

Bishop Alvarez-a küm ka dak tali tepuokdak liasü. Pai sorkar anema asalentong tamajung yanglu, ta aija küm 26 tepuokdak ayutsü obendang agütsür liasü.

Yaküm August ita nung Álvarez 'house arrest' asü aser February ita nung Nicaragua senso agienba den külemi akümüli piyong atema pa temeden agienja liasü.

2018 küm nürburtemi Ortega Tir menden nungi anentsü takhangba agüja longkak aitba sülen nungi sorkari parnok anema ola adokertem aser Arogo lenirtem anema inyak tenzüka liasü.

Nicaragua nung Ortega-i aniba Sandinista National Liberation Front sorkari

Mother Teresa's charity densema melungtet telok 3,000 dak tema anentsüogo.

Vatican den tezüngzüktep agiba sülen yaküm October ita nunga Nicaragua sorkari Khristan putir 12 shi chioka liasü saka parnok ajak Rome-i yok. Yimtenren tsütsülen nungi putir ajakji tepuokdak yua liasü. Iba linük nung sorkar anema jembirtem aser aitsürtem kanga reshikangshir.

Iba mapang nungji Vatican nung press office director Matteo Bruni-i, putir 12 ji Italy nung aliba Rome Diocese indang kiojen nung lidaktsütsü, ta metetdakja liasü.

Christian Solidarity Worldwide (CSW) nung Advocacy tongti, Anna Lee Stangl-i, putirtem chiokbaji Nicaragua sorkari mapa tajung ka inyakba ama asenoki mezüngshitsüla, ta metetdaktsü.

Stangl-isa alima linüktem dang Nicaragua linük nung nürburtem temeden nokdangba atema Tir Daniel Ortega aser pai aniba sorkar aitsütsüla, ta metetdaktsü.

ANOGO ABEN TSÜNGREM DEN

Sarasademi Tsüngrem tebilemba meteter

Aser anepdang, sangwatsü mapang talangka lia, Pa shishir, azüngmeyakdaki kati ainshia ao aser yangji sarasadem. Mark 1:35.


Yisu anepongi sarasademi aoba nütüngtemi meteta liasü. Kodang parnoki Pa nungdadir Pa sarasademdaki aotsü parnoki metetta liasü. Kodang Yihudai Yisu ashioktsü, pai tsükchirtem Yisu sarasademdagi anir ao.

Mapang shia Yisu Khristai tongtipang telemtetba agidang Pai sarasadem. Kodang Pa dang Tebu inyakim nung masü, alima inyakim mapa inyaktsü atidang, Pai sarasadem (Matt. 4). Kodang nütüngtem shimtsü mapang aru, Pai aonung tepiyong sarasadem (Lk. 6:12). Tsüngrem chiri Tebui mulungba metettsü asoshi aonung sarasadem süra, Tebui mulungba tejanga metettsü asoshi asenoki mapang kopika agitsüla?

Aiben Yisu telok tului nungpanga liasü, Tebu ola angashitsü asoshi Pai sarasademdak ka nungdak ta Pai metetta liasü. Yisui leman melenshitsütsü meranger nisung aika liasü. Pa nütüngtem Pa telok alidaki odaktsünü (Mark 1:37). Teloki Pa chuba kümdaktsünü (Yohan 6:15).

Satani pa nükjidong melenshitsü atidang (Matt. 4:3,6,9). Yisui Pa missionji telok tulu anidentsüba masü, saka Tebu dang tashi angaa alitsüba ta angatetta liasü. Sarasadem agi Yisu tenzüka mapa asoshi renemtsü (Lk. 6:12). Sayatenya dang tama sarasadem liasü (Yn. 11:42-43); Lendong mapang nung sarasademi pa tasü itdaktsü (Lk. 9:28-31). Sarasademi Pa kangki-i atutsü tashi tasü itta kümdaktsü (Lk. 22:41-42); aser sarasademi timtem arema kangki Pa tanela odaktsü (Lk. 23:46). Kümtetdakba tatishitsü anidakang aser ne kija sarasadem nung Kibuba den mapang agiang aser ne taküm asoshi mapa renemang.

Tamil Nadu nung pastor ka rongseter lia angu



Pastor Abraham Parambil Thekkethil

January 15, 2024: Tamil Nadu nung police-i state arrtsülen Evangelical pastor ka tasü mang nguogo; pa anogo ter tejaklen samar liasü.

Pastor tasü mangji kanga mejungi rongsar liasü, ajisüaka par kibong züngsemtemi pa indang nangri, tsüngsem aser tenük-aina ajanga pa maitsüji jangja.

Pastor Abraham Parambil Thekkethil ya Vayalar Nagar Manthippara St. Thomas Evangelical Arogo nungi liasü aser pa tasü mangji Idukki-Tamil Nadu arrtsülen angu.

Forensic mongintemibo pa pasasa rongsentä asü asütsüa akok, ta shiogo.

Pa tekabo merongi liasü, anungji pai pasasa temang nung petrol shiliok asütsüa akok ta bilemer, pa anasa lighter-a ka

angu.

Taoba Hombarnü Arogo nung tongti putiri pastor Abraham samaba osang metetdaktsür liasü.

Abraham-i pa kinüngtsü den jabaso asangur ana toktsür asü.

Coronavirus wara metenzük dang pastor Abraham-i candle aser teronem menemtsü business tenzüka liasü, ajisüaka coronavirus wara ajanga pa business nung kanga takoksa ngua sentsüh million 2 shi aküm. Pai par kinüngtertem aser medemertem nungi senotsü teyari terabo nguogo, ajisüaka pa sentsüh aotsü atema iba jagi meperi.

Abraham-i hopta asem shia khenbosa Kerala kübok Pathanamthitta nung par ki semdanga liasü.

DNA densema tetendangba balala agiba sülen Abraham tasü mangji par kinüngtertem ket nung agütsütsü, ta kasa osang ajanga metetdaktsü.

India nung nütüng shilem 2.3 shi dang Khristantem lir, aser tang linük nung Khristantem anema inyakba kanga bulua akümba mapang ka nung pa rongseta süogo.

AO OSHI ANGAZÜKDAK:

TANÜ ANGAZÜKTSÜBA OJANG



Shirangshiji

(n) temang mejungi kümdaktsüba timtem (sickness)

* Tanü asüng tesem ajaklen shirangshiji kanga bulur.

Shirashirar

(adv) anepaneper masü, tebang dang majung (rough food, coarsely cooked)

* Jang majungba agi chi shirashirar sorutet.

OLONG PAITEP # 6668

Grid for OLONG PAITEP # 6668 with numbers 1-17 and shaded cells.

TIPIEN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6667 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Saudi columnist aser author Ritaj Al-Hazmi-i Guinness World Record tanabuba ngutetogo.

Arishi küm 15 tain Al-Hazmi-i "Youngest Female Newspaper Columnist" otsü tasen yanglutetogo. Taoba mapang lai "Youngest Female to publish a book series" atema Guinness World Records nguteta liasü. Iba mapang la arishi küm 12 tain liasü. Al-Hazmi-i Arab News atema ocet 10 zülutsüba atema tesüsabuba Guinness World Record agizük.

President Murmu-i taoba IS speaker PA Sangma nem tetushi agütsü



Tura, January 15, 2024

(Agencies): President Droupadi Murmu-i January 15 nü Meghalaya aser Assam semdangi arua lir aser tanü lai PA Sangma nem tetushi agütsü.

PA Sangma Sports Complex, Tura nung President Murmu-i taoba Lok Sabha Speaker aser Meghalaya Chief Minister Conrad Sangma tebu nem tetushi agütsü.

President Murmu tanü Baljek Airport, Jengjal tonga aru aser idangji Meghalaya Governor Phagu Chauhan aser Chief Minister Conrad Sangma nati la pelaa agizük.

Iba mapang Meghalaya Education Minister Rakkam A Sangma liasü.

Tanü President Murmu Guwahati nung arua anenzük aser Assam Chief Minister Himanta Biswa Sarma-i la pelaa agizük. Idak nungjagi la indangindanga Meghalaya-i apusoa ao.

President Murmu-i tang mezüng atema Meghalaya semdang. Iba mapang lai sentong balala nung adentsü aser telok balala den ajuruteptsü.

Meghalaya nung President Murmu-i Meghalaya Games lapoktsü aser January 16 nü lai Baljek Airport, Tura nung self-help groups züngsemtem den ajurutepa sensaksemtsü.

President Murmu-i Integrated Administration Complex yanglutsü atema lung

azüngtsütsü aser Mawphlang nung sentong ka nung o jembitsü. Laisa Rongjeng Mangsang Adokgre Road aser Mairang Ranigodown Azra Road lapoktsütsü.

Maneni lai Shillong Peak Ropeway aser Kongthong, Mawlyngot o Kudengrim nung tourist accommodations yanglutsü atema lung azüngtsütsü.

Asüng nikongdang Meghalaya sorkari Raj Bhavan, Shillong nung President Murmu nem civic reception ka ayonga agitsü.

President Murmu-i January 17, 2024 nü Assam semdangtsü aser lai Taralango, Diphu nung Karbi Youth Festival lapoktsütsü.

Manipur nung IRB recruits tayimtsü ajanga Jorhat-i anir ao

Imphal, January 15, 2024

(Agencies): Manipur nung 10th aser 11th Indian Reserve Battalion (IRB) nung anioker nisung 1,724 tashi tayimtsü ajanga Assam-i anir ogo.

Parnok rongnung training Ustads 26 aser Commanding Officers 2 dena lir. Hombarnü parnok bus balala nung Imphal airport tashi anir aru.

Iba sülen Indian forces C

130 Aircraft ana ajanga Imphal airport nungi Jorhat tashi anir ao. Maneni, passengers 90 amenba cargo planes ana nung IRB police tem anir ao.

Parnok ya Lachit Borphukan Police Academy, Assam nung basic training atema yokba lir.

IRB police kinungertemi parnok gari lenmang ajanga anir maotsü akhangba ajanga Manipur sorkari parnok

tayimtsü ajanga Assam-i yoktsüsa aküm.

Chief Minister N Biren Singh-i nangzükba ama tayimtsü ajanga anir yok. Parnok ya Kuki nunger alidak National Highways ajanga süitsüba liasü.

October 2022 nung Manipur sorkari 10th aser 11th IRB recruitment results osang metetdakja liasü.

Tripura Police tsüngdang NLFT züngsem 5 temai adok



Agartala, January 15, 2024

(Agencies): Hombarnü Agartala nung National Liberation Front of Tripura (NLFT) PD group züngsem 5 tashi Tripura Police tsüngdang temai adokogo.

"NLFT (PD group) telungpur pungu- Netajoy Reang@ Naising (33), Mohonda Reang @ Salthang (36), Sukumar Reang @Sinai (27), Kiranjit Reang @ Berem (20) aser Bishnuram Reang @ Baikang (26) nunger temai adok. Parnok ajak ya North District nungi lir" ta Tripura Police AIG Law and Order-i ashi.

"Parnoki Bangladesh tesep nungi adoker India-i arur temai adokogo. SB Head Quarters Agartala nung Tripura Police tsüngdang parnok temai adok. Iba sentong nung Krishnendu Chakraverty DIGP (Intelligence) aden" ta pai ashi.

Parnoki Chinese Pistol ka, Chinese-made rifles ana, 17 live rounds, 70 mm short gun shell-10(ten), Walkie-talkie with charging port, 770 taka Bangladeshi currency, Bangladeshi mobile SIM cards 2, Extortion notice 5 aser extortion

receipts 5 agütsü.

"NLFT(PD)-i Bangladesh nungi arua kanga mapa inyaksangshia aru. January 2023 nungi NLFT züngsem aika sepaitem matsüngdang temai adokogo. Anungji Tripura Police aser security forces tsüngdang NLFT züngsem 26 temai adok" ta Tripura Police sangdong ka nung ashi.

Iba mapang tsüngda Tripura Police-i NLFT züngsem 8 puogo. Tanü züngsem 5 temai adokba ajanga Tripura state nung telungpur khuret mali kümogo ta parnokisa metetdaktsü.



New Year Offer
NPSC FOUNDATION COURSE
@Just RS. 25,000/-
Offer valid till 15th Jan' 2024
Be the Next EAC - DSP - SA of the State

COURSE BENEFITS

FREE

- MATERIALS
- ANSWER WRITING PROGRAM
- MOCK TEST SERIES
- ESSAY WRITING PROGRAM
- MOCK INTERVIEW
- GENERAL ENGLISH PROGRAM
- CURRENT AFFAIRS MAGAZINE

PLUS FREE CERTIFIED
COMMUNICATION SKILLS & PERSONALITY DEVELOPMENT CLASSES
with coordinators of
TRINITY COLLEGE LONDON
Join the No.1 Civil Service Institution

📍 KOHIMA CAMPUS 📍 DIMAPUR CAMPUS

🌐 eduversityplus.com ✉️ eduversitykohima@gmail.com

☎️ +91 7005114715 ☎️ +91 7085685569

Israel-Hamas rara nung nisung asür 24,000 alemogo

Jerusalem, Aenjeti/ January 15 (Agencies): Tesüiba ghonda 24 tsüngta Israel nungeri bomb poklochtsüdang asüba nisung tasü mang 132 mozüki balalai bener aruogo, ta Gaza indang Health Ministry ajanga Hombarnü ashi. Parnok rongnung nisung 33 bo Israel-i tayimtsü amshia Gaza City amakdang asü, ta Gaza indang Civil Defense teloki ashi.

Mozüki balalai nisung 252 yirur alirtem anir aru, ta Hamas-i yimsü asüba territory nung aliba ministry ajanga anogoshi sangdong nung ashi.

Iba ya ajanga Gaza nung October 7 nü nung rara tenzüker asür nisung 24,100 jungogo aser yirur alira nisung 60,834 lir ta ashi. Israel-i rara nung telungpur 8,000 shi tepsetogo ta ashir.

Palestine nung aliba telungpur telok, Hamas-i hopta tatemlen video ka nung Israel nunger asem pua aliba tia indang sangdongtsü imla lia Israel sepaitemi Hombarnü Gaza south, north aser centre nung tenük yoker bomb poklochtsü.

Pua alir par asem ya Islamist Hamas telungpur ajungbena October 7 nü Israel south tsütsü arütsü alema aita amakdang apuba nisung 240 rongnung dena liasü.

Israel mitkar temi ano maneni Hamas lenirtem aser züngsemtem alidak south tsütsü operation agitsü ta ashir. Parnoki mezüngbo iba Strip north tsütsü tashi ajak amshia maka liasü.

Nisung million ana jungnüa süki aser khen asoshi yangluba tesemtem nung jenoka lir, kong chiyongtsü, totzü aser mozü agi anüngba ajanga ayawara aser tashidak tamajung poktetsü anameta nung lir.

Kasa mapang United Nations nung agency balalai Hombarnü Gaza nung humanitarian ceasefire alitsü maneni tayongzükba agütsüogo.

Myanmar nung telungpur telok kati arrtsü nung aliba jila ka atsüngogo

Yangon, Aenjeti/January 15 (Agencies): Myanmar nung telungpur telok kati India aser Bangladesh den arrtsü nung aliba jila ka atsüngogo, ta Reuters sangdong ka ajanga Hombarnü metetdaksü.

Iba jila atsüngba ajanga military sorkar atema takoksa tulu ajangshiba sayur, shirnok linük kübok tesem balala nung telungpur telok balala den rara arudar.

Arakan Army (AA), ta nüngja agütsür aliba telok kati Deobarnü aonung ashiba agi, parnoki Kaladan ayong tzüküm nung aliba Paletwa jila atsüngogo. Iba jila ya kidanger linüktem den shishilembatsü atema kanga tongtibang lir.

"Arrtsü nung ken o balala dak sendakba nung onoki takokba tashi kidanger linüktem den sendaktepa inyaksü," ta iba telok otongdar Khine Thu Kha-i ashiba, Reuters sangdong ka ajanga metetdaksü.

Paisa, parnoki iba tesem nung administration aser law enforcement belenzüka inyaksangshitsü, ta ashi.

Taoba hopta China den arrtsü nung aliba Laukkai jila, 'Three Brotherhood Alliance' ta nüngja agütsür sorkar anema nokdakba telungpur telok asemi tentetba telok kati atsüngba sülen tang iba jila atsüngogo. "Kokang (Laukkai) tesem ajak joko Myanmar Military Council küboki maiter," ta telungpurtem yagi ashi.

2021 küm February ita army-i, Aung San Suu Kyi-i aniba sorkar atsüngtokba sülen Myanmar nung mepetmesü tulu adoka arudar. Taoba küm October ita telungpurtemi Myanmar military anema jenjang agi tenzük, kong pro-democracy parallel government-i teyari agütsüba allied anti-junta teloktemi military post aser jilatem aika atsüngogo.

Deobarnü Myanmar military-i, China den arrtsü nung aliba tesemtem nung telungpurtem den khen atema ceasefire benoktsü asoshi nangzüktepogo. Bodhbar aser Brehostibarnü China kübok Kunming yimti nung China teyongtsü ia sensaksemba sülen iba telemtetba ya agia liasü, ta China foreign ministry otongdar Mao Ning-i ashi.

Telungpurtemi military sorkar indang camp aser outpost tem mamaktsü asoshi tenangzükba agütsü aser kasa mapang nung sorkari artillery aser tayimtsü amshia telungpurtem mamaktsü tenangzükba agüja liasü.

Tractor meyirejang aikati Berlin yimtong nokdanga ayu

Berlin, Aenjeti/January 15 (Agencies): Sorkari diesel sayu magi aliba agitsü asoshi sentong yangluba atema mepelai aluyimertemi longkak aita arudar aser Hombarnü Germany nunger aluyimertem, truck anishirtem aser aluyimba dak sendakba nung inyakerteri parnok indang tractor aser tanga hadir tulutem bener Berlin kübok Brandenburg Gate nung adenshia liasü.

Police temi Hombarnü ashiba agi, longkak aitba sentong nung shilem agitsü atema tractor 3,000 shi tonga aruogo aser ano 2,000 shi lentom nung lir.

Tractor tem yagi yimti kübok tesem kar nung gari senzusenpong nokdanga liasü aser Berlin indang public transit agency-i inyakyim nung kanga tetsükdaksü adokba metetdaksüogo.

Chancellor Olaf Scholz-i subsidy tem agitsütsü asoshi sentong yangluba anema longkak aitba sentong nung shilem agitsü atema nisung 10,000 shi-i parnok tenüng züngoksemogo, ajisüaka Berlin police-i iba dang nungi nisung timba adenshitsu imlaba metetdaksüogo.

Aluyimertemi longkak aitba achaayangtsü atema police office 1,300 dak tema yokogo, ta Berlin police chief Barbara Slowik-i yimti nung lenirtem dang Hombarnü ashi.

Iba den bendenloksema Aluyimba lokti tentet balala nungi lenirtem, trade union tem aser Finance Minister Christian Lindner-i longkak aitba sentong nung o jembitsü imlar.

Deobarnü nikonngtsütsü police temi tractor tem linük yimtiba kübok governmental district nung longkak aitba tesemi meyoki nokdanga ayu.

Taoba hopta aluyimertemi highway kikümtong nokdanga ayu aser iba ajanga Germany kübok tesem balala nung gari senzusenpong nung tetsükdaksü adoka liasü. Sorkari telemtetba agiba agi temulung mesüi parnoki iba jenjang agia liasü.

Okadak ajanga obendang agütsüba ka nung sorkar budget nung multibillion-euro takoksa ajangshiba indang metetdaksüba sülen Berlin-i diesel aser aluyimba nung amshiba garitem indang subsidy agitsü aser parnok dang saru memeshi aliba melenshitsu atema telemtetba agi.

Sorkari, kümtem tsüngda aluyimertem rongsenketzüng jenjang tajungba kümogo aser ibayongji iba jenjang agir ta shiogo.

2022-23 financial year nung aluyimertemi otsütsüsa 115,400 euros (\$126,000) aazüka liasü, koba taoba küm dang nungi shilem 45 agi timba liasü.

January 4 nü sorkari, aluyimba nung amshiba garitem nungi saru magi aliba agitsü aser küm asem tsüngda diesel amshiba atema saru magi aliba agitsütsü ta ashi.

Scholz-i Honibarnü video osang ka ajanga, onoki aluyimertem tebilemba süoki ia agir ta ashiba den sorkari ajak ajangzüksü atema telemtetba ka agiogo ta bilemba lemsatepa liasü.

Ajisüaka opposition conservatives aser far-right party temi nongita yari aliba aluyimertemi ashiba agi, sorkari telangzüba agütsüba ya teperi masü.

"Aluyimertem sümatsü," ta aluyimer Karl-Wilhelm Kempner-i Deobarnü longkak aitba sentong nung adentsü atema bus ka nung tua amenba mapang ashi.

Subsidy tem tanaben magütsüra nüburtemi chiyongtsüji tongtibangba ta angatetsüla, ta paisa shisem.



Nipha virus tepsettsü yangluba vaccine ka University of Oxford nung aliba scientist temi nisung dak mezüngbuba tendangogo. Iba virus yagi Asia nung linük balala nüburttem aoksatsü aser iba tashidak agi meneper nisung noklang nung asür shilem 75 shi liasü. Oxford Vaccine Group ajanga yangluba ChAdOx1 NipahB vaccine ya arishi küm 18 nungi 55 tsüngta nisung 51 dak tendangtsü.

19th National Inter-District Junior Athletic Meet 2024 atema Mkg Athletics-i tetendangba ka agi




Mokokchung Athletics-i 'Athletic Meet' sentong ka arishi kum 16 & 14 tekubok pur atema Fazl Ali College ground nung ayongzuka akaba mapang tangokba noksa nung angur. Mokokchung, 15th January, 2024

Mokokchung, Aenjeti/ January 15 (TYO): Mokokchung Athletics teloki 'Athletic Meet' sentong ka arishi kum 16 aser 14 tekubok pur atema Jan 9 & 10, 2024 anogo ananü Fazl Ali College ground, Chuchuyimpang nung ayongzuka kaogo ta osang ka ajanga metetdaksü.

Iba sentong ya tongtibangsa Sports Authority of Gujarat den kulem sür ayongba 19th National Inter-District Junior Athletic Meet 2024 (NIDJAM) koba Feb 16-18, 2024 tashi Sardar Patel Sports City, Gujarat University, Navrangpura, Ahemdabad Gujarat nung asayatsüba lir, iba

asayamung nung shilem agitsü asoshi asayartem shimtsü nükjidong nung ayongzuka aka. Iba asayamung nung asaya balala nung shilem agitsü atema Mokokchung district nungia asayar parnok 15 shimteto, ta osang ajangasa ashi. Asayartem shimba sentong nung parnok 30-i shilem agia liasü.

McGregor-i Ryan Curtis nem pound 25,000 tenla agütsü



Conor McGregor



Ryan Curtis

Aenjeti/January 15, 2024 (Agencies): Ireland nunger MMA fighter Ryan Curtis training agiba mapang pa taküm melenshitsüsa yiruba sülen Conor McGregor-i pa nem pound 25,000 tenla agütsüo. Fighter Leah McCourt-i ashiba agi, arishi kum 31 tain Curtis, teberem, tekong aser tongtired raksaogo. Curtis ya 2015 kum nungi professional ka ama asaya arua liasü aser pa Cage Warriors aser Bellator cards nung asayaogo. McGregor-i social media

nung post ka ajanga, pai Dublin nungi asayar nem teyari agütsüba aser pa takaratiba nung aneptsü imlaja ataba lemsatepa liasü. Belfast boxer Michael Conlan, MMA fighters Molly McCann aser Dillon Danis aser coach John Kavanagh nungeria Curtis aser par kibong nem tenla agütsüo. Instagram nung post ka ajanga McCourt-i, "pa temang kodang anepaluzüksü iba indang osang tejangja memetet," ta ashi. "Ryan-i pai meimba joko

kodanga minyaktetsü aser pa mezükteptetsü mesüra MMA atema training magitetsü. Pai arishi kum 11 asüdang nung bendanga agüja asayaba asaya nung pa joko masayatetsü," ta lai ashi. "Ryan taküm nung timtem tekangshi aika ajangshiogo aser item ajak kokteta pa nisung tajungba aser medemder tajungba kumogo. "Pa tamang makai mali aser ano taküm nung tetsükdaksü ka ajangtsü atema temlungtetba tulu nung lir," ta laisa shisem.

Australian Open: Osaka tsükogo; Garcia, Gauff, Jabeur 2buba round-i iogo

Aenjeti/January 15, 2024 (Agencies): Tang asaya aaliba Australia Open tetsür kija asaya nung taoba champions Naomi Osaka mezüngbuba round nung Caroline Garcia-i tsükdaktsüo. Ita 15 tashi masayai lir tanaben asayashi tenzükba sülen asaya asembuba nung Osaka ya 6-4, 7-6 (2) agi Garcia-i tsükdakja liasü. Asaya nung Garcia-i Osaka nem breakpoint ka danga magütsü aser rally tem timba tatsütsüdang liasü. Kasa mapang nung U.S. Open champion Coco Gauff-i tetsür kija asaya mezüngbuba round nung Anna Karolina Schmiedlova minute 60 nung dang koka tanabuba round tongteto. Iba asaya nung Gauff-i

lasasa dak kanga temlung lemteta service kanga junga ao aser 6-3, 6-0 agi Anna ayong ayonga koka liasü. Kasa asayamung nung Ons Jabeur-ia mezüngbuba round nung Yuliia Starodubtseva koka tanabuba round-i iogo. Lai Ukraine tsür qualifier Yuliia Starodubtseva ya 6-3, 6-1 agi ayong ayonga koka liasü. Tunisia tsür la yagi kanga jungabo masayatet, ajisüaka la indang shot tem ya Schmiedlova atema agizüksü tasak liasü. Margaret Court Arena nung asayaba mapang Jabeur-i unforced errors 28 mena aser winners 15 ngua liasü. Lai Anna indang service trokben tashi break süa liasü, koba asaya akoktsü atema kanga tongtibang liasü.

Asia Olympic Qualifiers: Yogesh-i gold medal ana angu



Aenjeti/January 15, 2024 (Agencies): Tang asaya aliba Asia Olympic Qualifiers nung India nunger shooter temi maneni kanga junga asaya arudar aser Hombarnüa Yogesh Singh-i tebur 25m centre fire pistol tetoktepba nung kija aser team asaya nung gold medal nguogo. Yogesh-i kija asaya nung point 573 ngua gold medal angu. Pa sülen tanabuba jenjang nung Oman nunger Muad Al Balushi (570) aser tasembuba jenjang nung Indonesia nunger shooter Anang Yulianto (567) liasü. Iba asaya nung India nunger rongnungi Pankaj Yadav (567) aser Akshay Jain (564) natia shilem agi aser tena pezübuba aser trokbuba nung tembanga liasü.

India nunger shooter asem yagi ajak senteper point 1704 ngua team asaya nung gold medal angu aser parnok sülen Oman aser Indonesia na liasü. Kuwait City nung shotgun atema qualifiers nung Commonwealth Games gold medallist Shreyasi Singh-i tetsür trap asaya nung point 19 dang nguteta la tongbuba nung asaya tembang. Shreyasi-i round pongu nung point 115 anguba sülen final atema pezübuba nung qualify süa liasü. Ajisüaka tetsür trap team asaya nung India tsür Shreyasi, Manisha Keer aser Bhavya Tripathi nungeri point 328 nguteta silver medal angu. Iba asaya nung China-i gold aser Kazakhstan-i bronze medal ngua liasü.

BILEMDANGANG
"Tamakok anguba ajanga dang takok shisanger."